



**Hope & Homes** for Children

Dnevni avaz  
Redakcija

**Predmet: Reagovanje na članak i molba za objavu reakcije**

Br: 02-301 - 04/2014

24.4.2014. Sarajevo

Poštovani,

Ovim putem želimo da reagujemo na članak koji je objavljen u Dnevnom avazu od 24.4.2014. godine pod naslovom „Silovatelju djevojčica nisu ni sudili“, a u čijem potpisu stoji Centar za istraživačko novinarstvo.

Sa žaljenjem i razočaranjem moramo konstatovati da ovaj članak, kao i širi tekst na istu temu koji se nalazi na web stranici pomenutog Centra, pruža nepotpunu, poluistinitu i nezasluženo negativnu sliku porodičnog oblika zbrinjavanja djece bez roditeljskog staranja tj. hraniteljstva. Tekst je napisan pretenciozno i skandalozno, s jasnom namjerom da se u potpunosti ocrni hraniteljstvo kao oblik zaštite, u tolikoj mjeri da se nameće ideja da je članak možda i sponzorisan od određenih interesnih grupa.

Zbog čega ovo tvrdimo? Prosto je nevjerovatno da jedan Centar, koji sebe naziva istraživačkim, objavi samo dio razgovora koje je vodio i saznanja do kojih je došao, i to baš onih koji u negativnom svjetlu govore o hraniteljstvu. Istovremeno, iz teksta su potpuno izbačene sve informacije do kojih su novinari ovog Centra došli kroz dvosatni razgovor sa predstavnicom naše organizacije, te kroz razgovore sa samim hraniteljima, a koje afirmišu hraniteljstvo i stavljaju ga u jedan realan ali pozitivan kontekst.

Zar je moguće da jedan „istraživački“ novinarski centar u prvi plan stavi tri negativne priče, a da ni u jednoj jedinoj rečenici ne pomene nebrojena pozitivna iskustva djece koja odrastaju ili su odrasla u hraniteljstvu? Činjenica stoji da hraniteljstvo u Bosni i Hercegovini niti je dovoljno razvijeno, niti je dovoljno praćeno i podržano od strane nadležnih centara za socijalni rad, ali slučajevi o kojima „Centar za istraživačko novinarstvo“ piše su izuzetak a ne pravilo. Naspram ove tri priče, stoje stotine priča djece koje su u hraniteljskim porodicama širom BiH pronašle ljubav, zaštitu i najbolju moguću brigu i pripremu za samostalan život. Zašto u ovom tekstu nismo vidjeli barem jednu takvu priču?



## Hope & Homes for Children

Iz teksta ovog „istraživačkog“ centra nismo saznali čak ni to zbog čega se odrastanje djece bez roditeljskog staranja u porodičnom okruženju svugdje u svijetu favorizira u odnosu na smještanje djece u institucije, šta se to u Bosni i Hercegovini radi da se sistem hraniteljstva unaprijedi i stručni radnici osposobe da kvalitetnije prate proces udomljavanja djece, niti bilo šta što bi ikome moglo dati ispravnu sliku ovog plemenitog posla.


Saznali smo samo da je „novčana naknada najveći mamac za uzimanja djece u hraniteljstvo“, ali ako neko poznaje hranitelja koji je od **neredovne** mjesečne naknade za dijete u iznosu od 150 do 470 KM (ovisno o kantonu) nešto zaradio nakon što tom djetetu kupi hranu, odjeću, obuću, knjige, opremu za školu ili pelene – zaista bismo ga voljeli upoznati. Kada zakonom hranitelji dobiju pravo na sopstvenu novčanu naknadu pored naknade za dijete, kao što je to slučaj u svim razvijenim zemljama, onda možemo razgovarati o zaradi koja će, usput rečeno, biti u potpunosti zaslužena, kao i za svaki drugi posao koji čovjek radi predano i s ljubavlju.

Na kraju, potpuno smo saglasni da sve slučajeve zlostavljanja i zloupotrebe u hraniteljstvu ili bilo gdje drugo treba u potpunosti istražiti i najstrožije sankcionisati, te da treba mnogo više raditi na njihovoj prevenciji. Naša organizacija već oko 15 godina radi na razvoju hraniteljstva i jačanju kapaciteta stručnih radnika širom Bosne i Hercegovine, sa ciljem da se za svako dijete koje nema tu sreću da odrasta sa svojim roditeljima nađe odgovarajuća, adekvatno pripremljena i educirana zamjenska porodica koja će mu pružiti brižan i SIGURAN dom.

Uvjereni smo da takvih porodica ima jer je samo kroz naše projekte preko 60 djece uspješno smješteno u hraniteljstvo, a oko 80 porodica je animirano, educirano i certificirano za bavljenje hraniteljstvom. Sigurni smo da takvih porodica ima i više i stoga kontinuirano radimo na promociji hraniteljstva i animiranju novih porodica. Šteta je što ovaj „istraživački“ centar ni riječ nije napisao o svim tim naporima iako su o njima bili informisani i iako im je osnovni postulat profesionalnog novinarstva nalagao da jednu priču istraže iz svih mogućih uglova.

Organizacija Hope and Homes for Children stoji vam na raspolaganju za sve dodatne informacije o hraniteljstvu i deinstitutionalizaciji dječije zaštite u Bosni i Hercegovini. Nadamo se da ćete objaviti našu reakciju i unaprijed se zahvaljujemo.

S poštovanjem,

  
**Anisija Radenković**  
direktorica

